

**BRČKO DISTRIKT  
BOSNE I HERCEGOVINE  
PRAVOSUDNA KOMISIJA  
BRČKO DISTRIKTA  
BOSNE I HERCEGOVINE**

**PLAN RADA  
ZA 2025. GODINU**

**Brčko, decembar 2024. godine**



Trg pravde 10, 76100 Brčko distrikt Bosne i Hercegovine; tel: 049/217-955; fax: 049/235-070; mail: pkbd@pkbd.ba  
Трг правде 10, 76100 Брчко дистрикт Босне и Херцеговине; тел: 049/217-955; факс: 049/235-070; е-пошта: pkbd@pkbd.ba

## **UVOD**

Statutom Brčko distrikta Bosne i Hercegovine - prečišćeni tekst („Službeni glasnik Brčko distrikta Bosne i Hercegovine“, broj 2/10 - u daljem tekstu: Statut Distrikta), članom 71. stav (1) propisano je da se zakonom osniva Pravosudna komisija Brčko distrikta BiH (u daljem tekstu: Pravosudna komisija).

Zakonom o Pravosudnoj komisiji Brčko distrikta BiH („Službeni glasnik Brčko distrikta BiH“, br.: 19/07, 20/07, 2/08, 4/21 i 6/21), članom 2. propisano je da je Pravosudna komisija samostalno i od drugih organa vlasti Brčko distrikta BiH nezavisno tijelo koja svoja ovlaštenja obavlja u okviru djelokruga utvrđenog Statutom Distrikta.

Članom 14. Zakona o Pravosudnoj komisiji propisano je da će Pravosudna komisija obavljati slijedeće poslove:

- obezbjeđivanje nezavisnosti Osnovnog i Apelacionog suda, Tužilaštva Distrikta, Kancelarije za pravnu pomoć i Pravobranilaštva,
- obezbjeđivanje stručnog usavršavanja sudija, tužilaca, pravobranioca, advokata Kancelarije za pravnu pomoć i stručnih saradnika u pravosuđu i Tužilaštvu Distrikta,
- donošenje i sprovođenje etičkog kodeksa zaposlenih u pravosuđu (izuzimajući sudije Osnovnog i Apelacionog suda), zaposlenih u Tužilaštvu Distrikta (izuzimajući tužioce), Pravobranilaštva, Kancelarije za pravnu pomoć uključujući pokretanje disciplinskog postupka zbog kršenja kodeksa,
- imenovanje i razrješenje pravobranioca i njegovih zamjenika,
- imenovanje i razrješenje direktora Kancelarije za pravnu pomoć i advokata Kancelarije,
- imenovanje i razrješenje stručnih saradnika i pripravnika u Osnovnom i Apelacionom sudu, Tužilaštvu Distrikta, Kancelariji za pravnu pomoć i Pravobranilaštvu,
- pripremu i dostavljanje Skupštini zakona koji se odnose na organizaciju i rad Osnovnog i Apelacionog suda, Tužilaštva Distrikta, Pravobranilaštva i Kancelarije za pravnu pomoć, kao i na regulisanje rada advokata i notara u Distriktu,
- imenovanje notara i regulisanje rada notara u Distriktu,
- pripremanje i predlaganje Skupštini onog dijela budžeta Distrikta kojim se obezbjeđuju operativni troškovi za rad Osnovnog i Apelacionog suda, Tužilaštva Distrikta, Pravobranilaštva i Kancelarije za pravnu pomoć i za rad Pravosudne komisije,
- ostvarivanje saradnje s ministarstvima pravde i drugim nadležnim institucijama u BiH,
- izbor člana za Visoko sudsko i tužilačko vijeće BiH,

- utvrđuje potreban broj advokata u Kancelariji za pravnu pomoć,
- donosi i daje saglasnost na pravilnike kojima se reguliše rad Osnovnog i Apelacionog suda, Tužilaštva Distrikta, Pravobranilaštva i Kancelarije za pravnu pomoć i Stručne službe Pravosudne komisije,
- donosi pravilnike o uslovima za obavljanje poslova vještačenja i poslova sudskih tumača,
- imenuje i razrješava dužnosti komandira Sudske policije i određuje broj sudskih policajaca,
- objavljuje javni konkurs i vrši izbor za sva upražnjena radna mjesta službenika i namještenika u Osnovnom i Apelacionom sudu, Tužilaštvu Distrikta, Kancelariji za pravnu pomoć i Pravobranilaštvu i stručnoj službi Pravosudne komisije,
- najmanje dva puta godišnje razmatra izvještaj o radu Osnovnog i Apelacionog suda, Tužilaštva Distrikta, Pravobranilaštva i Kancelarije za pravnu pomoć i Pravosudne komisije, te ih u vidu informacija dostavlja Skupštini ukoliko nije drugačije regulisano posebnim zakonima,
- koordinira projekte koje je pokrenulo Visoko sudsko i tužilačko vijeće BiH, a koje se odnosi na poboljšanje rada sudova i Tužilaštva i efikasnost upravljanja predmetima,
- unapređuje rad Pravobranilaštva, Kancelarije za pravnu pomoć i Stručne službe Pravosudne komisije,
- obavlja i druge poslove utvrđene Ustavom BiH, Statutom Distrikta i zakonima.


Pravosudna komisija ima sjedište u Brčkom, ul. Trg pravde br. 10. Pravosudnu komisiju čini devet članova i to:

1. predsjednik Ustavnog suda BiH ili sudija tog suda koga on odredi kao svog zamjenika,
2. predsjednik Apelacionog suda,
3. predsjednik Osnovnog suda,
4. glavni tužilac,
5. direktor Kancelarije za pravnu pomoć,
6. pravobranilac,
7. tri građana Distrikta, koje bira Skupština Brčko distrikta BiH.

Pravosudna komisija ima predsjednika i potpredsjednika Komisije koji se biraju iz reda članova Komisije, sa mandatom od četiri godine, a po isteku mandata mogu biti ponovo birani. Predsjednik predstavlja i zastupa Pravosudnu komisiju, a u njegovoj odsutnosti zamjenjuje ga potpredsjednik.

Finansijsko-računovodstvene, poslove informacionih tehnologija, stručne i administrativne poslove za potrebe pravosuđa obavlja Stručna služba Pravosudne komisije.

## ORGANIGRAM PRAVOSUDNE KOMISIJE BRČKO DISTRIKTA BiH



## **PLAN RADA**

### **- Normativne aktivnosti:**

Pravosudna komisija planira u 2025. godini, uz stručnu, administrativnu i tehničku podršku Stručne službe, u skupštinsku proceduru uputiti sljedeće zakone:

#### **I- polugodište**

- Zakon o Pravobranilaštvu Brčko distrikta BiH,
- Zakon o sudskim vještacima Brčko distrikta BiH,
- Zakon o posebnom registru lica pravosnažno osuđenih za krivična djela spolnog zlostavljanja i iskorištavanja djeteta u Brčko distriktu BiH,
- Zakon o izmjenama i dopunama Zakona o Sudskoj policiji Brčko distrikta BiH.

#### **II- polugodište**

- Zakon o izmjenama i dopunama Zakona o parničnom postupku Brčko distrikta BiH,
- Zakon o izmjenama i dopunama Krivičnog zakona Brčko distrikta BiH,
- Zakon o izmjenama i dopunama Zakona o krivičnom postupku Brčko distrikta BiH,
- Zakon o izmjenama i dopunama Zakona o izvršenju krivičnih sankcija, pritvora i drugih mjera Brčko distrikta BiH,
- Zakon o izmjenama i dopunama Zakona o registraciji poslovnih subjekata Brčko distrikta BiH,
- Zakon o pravosudnom ispitu Brčko distrikta BiH,
- Zakon o sudskim tumačima u Brčko distriktu BiH.

Takođe, tokom 2025. godine planirano je usvajanje sljedećih podzakonskih akata:

- Pravilnik o izmjenama i dopunama Pravilnika o unutrašnjoj organizaciji i sistematizaciji radnih mjesta u pravosuđu Brčko distrikta BiH,
- Pravilnik o izmjenama i dopunama Pravilnika o unutrašnjoj organizaciji i sistematizaciji radnih mjesta u Stručnoj službi Pravosudne komisije,
- Pravilnik o izmjenama i dopunama Pravilnika o radu notara Brčko distrikta BiH,
- Pravilnik o postupku preuzimanja, čuvanja i korištenja spisa, dokumentacije, novca, vrijednosnih papira i drugih pismena u slučaju prestanka notarske djelatnosti,
- Pravilnik o programu stručnog ispita za stečajnog upravnika i načinu njegovog polaganja,
- Pravilnik o korištenju i održavanju službenih vozila u pravosudnim institucijama Brčko distrikta BiH,
- Pravilnik o obliku i izgledu službene legitimacije pravobranioca i zamjenika pravobranioca,
- Pravilnik o disciplinskoj odgovornosti pravobranioca i zamjenika pravobranioca,

### **- Strategija za reformu sektora pravde BiH**

Pravosudna komisija planira tokom 2025. godine, nakon usvajanja od strane Vijeća ministara BiH Strategije za reformu sektora pravde BiH 2023-2027, preuzimati aktivnosti vezane za provođenje strateških programa, a sve u cilju stvaranja efikasnog, efektivnog i koordiniranog sistema pravde u BiH koji je odgovoran prema svim građanima BiH i potpuno usklađen sa EU standardima i najboljom praksom, garantujući vladavinu prava. S tim u vezi, putem delegiranih članova, Pravosudna komisija će učestvovati i u radu funkcionalnih radnih grupa i tehničkom sekretarijatu za izradu novog strateškog okvira.

### **- EU integracije**

Pravosudna komisija će tokom 2025. godine nastaviti rad na poslovima vezanim za EU integracije, što uključuje rad u Pododboru za pravdu slobodu i sigurnost, Programu integrisanja, radnim grupama imenovanih u procesu evropskih integracija na lokalnom nivou i nivou BiH, te će kontinuirano saradivati sa Odjeljenjem za evropske integracije i međunarodnu saradnju Vlade Brčko distrikta BiH i Direkcijom za EU integracije BiH.

### **- Borba protiv korupcije**

Pravosudna komisija je delegiranjem svojih predstavnika u radne grupe uzela aktivno učešće u izradi Strategije za borbu protiv korupcije u Brčko distrikta BiH za period 2025.-2028. godine i Akcionog plana za sprovođenje strategije za borbu protiv korupcije u Brčko distriktu BiH za period 2025-2028. godine. U toku 2025. godine, kontinuirano će se raditi na realizaciji aktivnosti iz navedenih dokumenata, kao i izvještavanju o realizovanim aktivnostima, u kojima Pravosudna komisija bude identifikovana kao nosilac aktivnosti.

Takođe, radiće na provedbi aktivnosti predviđenih u Planu integriteta institucije, kao i na edukaciji službenika u oblastima borbe protiv korupcije, povećanju transparentnosti rada, etičnosti, integritetu i doličnom ponašanju.

### **-Edukacija**

U pogledu edukacije sudija, tužilaca, stručnih saradnika sudova Distrikta i Tužilaštva Distrikta, Pravosudna komisija će nastaviti saradnju sa entitetskim Centrima za edukaciju sudija i tužilaca, a po programu početne obuke i stručnog usavršavanja. U skladu sa usvojenim Programom početne obuke i stručnog usavršavanja entitetskih centara za edukaciju sudija i tužilaca za 2025. godinu, Pravosudna komisija će u toku 2025. godine biti domaćin i organizator seminara na temu:

- „Korištenje Sky i Anom aplikacije kao dokazi u krivičnom postupku i dosadašnja iskustva i praksa u Bosni i Hercegovini i regiji“,
- „Utvrđivanje visine zakonske zatezne kamate kod naknade materijalne štete u slučaju auto odgovornosti“.

Kroz rad u organizacionom odboru za godišnje savjetovanje iz krivične oblasti u Neumu, Pravosudna komisija će uzeti učešće u planiranju i realizaciji ovih aktivnosti.

Vežano za edukaciju službenika i namještenika u pravosuđu Brčko distrikta BiH, Pravosudna komisija će u narednom periodu, u skladu sa usvojenim Planom stručnog usavršavanja službenika i namještenika u pravosuđu Brčko distrikta BiH za 2025. godinu planirati seminare za službenike i namještenike uvažavajući iskazane potrebe pravosudnih institucija i obaveze koje proizilaze iz usvojenih strateških dokumenata. Teme seminara za službenike i namještenike u pravosuđu Brčko distrikta BiH koji će se održati u toku 2025. godine su:

- Finansijsko upravljanje i interna kontrola/izrada i ažuriranje Mape poslovnih procesa,
- Sukob interesa ( građanske i političke aktivnosti, postupanje sa poklonima i drugim koristima zabrana korištenaj ugleda pozicije u pravosuđu za sticanje privatne koristi),
- Integritet i dolično ponašanje (ponašanje van institucije koje šteti ugledu pravosuđa, odijevanje, predstavljanje, zabrana mobinga i uznemiravanje, odnosi sa strankama i drugim zaposlenicima),
- Odgovornost prema poslu (poštivanje radnog vremena institucije, postupanje sa službeno dostupnim informacijama, izvršavanje naloga pretpostavljenog i odbijanje nezakonitog naloga, pružanje informacija strankama).

#### **- Informisanje javnosti**

U 2025. godini javnost će biti redovno obavješćavana o radu Osnovnog, Apelacionog suda, Kancelarije za pravnu pomoć, Pravobranilaštva i Pravosudne komisije Brčko distrikta BiH. Javnost će se informisati i kroz saopštenja za javnost koja će se dostavljati medijima, a biće i objavljena na web stranicama pravosudnih institucija na koje se odnose. Takođe, putem portparola redovno će se obavljati poslovi vezani za pristup informacijama koje su pod kontrolom pravosudnih institucija. Nastaviće se redovne aktivnosti vezano za uređivanje internet stranice Pravosudne komisije Brčko distrikta BiH objavljivanjem dnevnih redova, usvojenih zapisnika i značajnih odluka donesenih na sjednicama Pravosudne komisije.

#### **- Rad za opšte dobro na slobodi**

Pravosudna komisija će nastaviti sa izvršenjem presuda sudova Distrikta, kojim su kazne zatvora zamjenjene radom za opšte dobro na slobodi S tim u vezi, putem službenika Pravosudne komisije, vršiće se uvid u izvršenje rada osuđenih lica i dostavljati zaključne izvještaje o izvršenom radu Osnovnom sudu.

#### **- Lista stalnih sudskih vještaka i tumača u Brčko distriktu BiH**

U cilju unapređenja oblasti sudskih vještaka, u okviru normativnih aktivnosti predviđeno je da se u toku 2025. godine u skupštinsku proceduru uputi prijedlog Zakona o sudskim vještacima Brčko distrikta BiH. Aktivnosti na realizaciji ovog plana, shodno odluci Pravosudne komisije, počele su krajem 2024. godine, imenovanjem radne grupe i početkom rada na pripremi propisa. U toku 2025. godine, planiran je nastavak aktivnosti na pripremi prijedloga ovog Zakona, kako bi u skladu sa planiranim normativnim aktivnostima prijedlog bio upućen u skupštinsku proceduru u prvoj polovini 2025. godine.

Takođe, u sklopu normativnih aktivnosti za 2025. godinu predviđeno je upućivanje u skupštinsku proceduru i prijedloga Zakona o stalnim sudskim tumačima u Brčko distrikta BiH, kojim će detaljnije biti uređena ova oblast. Slijedom navedenog Pravosudna komisija Brčko distrikta BiH će u toku 2025. godine imenovati radnu grupu koja će raditi na pripremi prijedloga ovog normativnog akta.

Stručna služba Pravosudne komisije će u 2025. godini nastaviti aktivnosti propisane relevantnim propisima koji uređuju uslove, način i postupak upisa na listu stalnih sudskih vještaka i tumača u Distriktu, konkretno, vršiće sve aktivnosti vezano za pripremu i izradu rješenja o davanju i oduzimanju odobrenja za vršenje ovih poslova, te aktivnosti oko vođenja i redovnog ažuriranja Liste stalnih sudskih vještaka i Liste stalnih sudskih tumača u Brčko distriktu BiH.

Pravosudna komisija će nastaviti, u skladu sa Zakonom o sudovima Brčko distrikta BiH i gore navedenim zakonskim odnosno podzakonskim aktima, odlučivati o žalbama izjavljenim protiv prvostepenih rješenja u postupku davanja/oduzimanja odobrenja za upis/brisanje sa Liste stalnih sudskih vještaka i Liste stalnih sudskih tumača.

#### **-Lista stečajnih upravnika u Brčko distriktu BiH**

Pravosudna komisija će tokom 2025. godine u skladu sa Zakonom o stečaju i Zakonom o likvidacionom postupku i usvojenim podzakonskim aktima raditi na poslovima imenovanja stečajnih upravnika kao i na poslovima vođenja i revidiranja Liste stečajnih upravnika. Tokom 2025. godine kroz usvajanje podzakonskih akata, Pravosudna komisija planira ispuniti uslove kojim će se omogućiti polaganje ispita za stečajne upravnike na području Brčko distrikta BiH.

#### **- Registar testamenata i drugih nasljednopravnih poslova**

Pravosudna komisija će u toku 2025. godine kontinuirano preduzimati sve aktivnosti na vođenju Registra testamenata i drugih nasljednopravnih poslova, koja obaveza je propisana Zakonom o nasljeđivanju Brčko distrikta BiH.



#### **- Evidencija o službenim legitimacijama sudija u Brčko distriktu BiH**

U skladu sa Odlukom o obrascu i izgledu službene legitimacije za sudije u Brčko distriktu BiH, Stručna služba Pravosudne komisije će kontinuirano preduzimati sve aktivnosti na izdavanju legitimacija, a potom i ažurnom vođenju evidencije o izdatim legitimacijama sudija u Distriktu.

#### **- Vođenje personalnih poslova za sve zaposlene u pravosudnim institucijama**

Stručna služba će u 2025. godini, u skladu sa Zakonom o službenicima i namještenicima u pravosuđu Brčko distrikta BiH („Službeni glasnik Brčko distrikta BiH“-prečišćeni tekst, broj: 13/23) i podzakonskih akata, nastaviti sa urednim vođenjem personalnih poslova za sve zaposlene u pravosudnim institucijama. S tim u vezi, putem službenika za personalne poslove izdavaće potvrde i druge akte vezane za radnopravni status zaposlenih.

#### **- Upravljanje privremeno oduzetom imovinom u krivičnom postupku**

U skladu sa Zakonom o oduzimanju nezakonito stečene imovine Brčko distrikta BiH („Službeni glasnik Brčko distrikta BiH“, broj:29/16 i 13/19), oduzetom imovinom i podzakonskim aktima, Stručna služba Pravosudne komisije upravlja i raspolaže privremeno oduzetom imovinom. U narednom periodu, Pravosudna komisija će raditi na stvaranju uslova (organizacionih i materijalnih) koje su vezane za upravljanje privremeno oduzetom imovinom.

#### **- Nadzor nad radom notara u Brčko distriktu BiH**

Pravosudna komisija će tokom 2025. godine nastaviti aktivnosti u pogledu vršenja nadzora nad radom notara u Brčko distriktu BiH. Takođe, u 2025. godini radiće se na unapređenju zakonskog i podzakonskog okvira kojima je regulisan status i rad notara u Brčko distriktu BiH.

#### **- Ostale aktivnosti**

Pravosudna komisija će nastaviti saradnju sa državnim i entitetskim ministarstvima pravde, VSTV-om BiH, entitetskim centrima za edukaciju sudija i tužilaca, nevladinim organizacijama, i drugim institucijama koje se bave pitanjima pravosudnog sistema u Bosni i Hercegovini. Takođe, putem delegiranih predstavnika, Pravosudna komisija će učestvovati u radu radnih grupa imenovanih na državnom nivou, kako od strane Pravosudne komisije, tako i od strane Vlade Brčko distrikta BiH, odnosno gradonačelnika Distrikta. Pored navedenog, Pravosudna komisija će nastaviti da blagovremeno djeluje i po svim drugim pitanjima koje se odnose na poslove iz nadležnosti propisane zakonom.

Putem delegiranog predstavnika nastaviće u Nadzornom tijelu za praćenje provođenja Revidirane Državne Strategije za rad na predmetima ratnih zločina.

U toku 2025. godine, biće pružena stručna pomoć Komisiji za uslovni otpust osuđenih lica u Brčko distriktu BiH, u vidu pripreme i dostavljanja gradonačelniku Brčko distrikta BiH Odluke kojom se reguliše rad Komisije za 2025. godinu, te kontinuiranog postupanja u smislu izvršenja obaveza u skladu sa donesenom Odlukom.

Pravosudna komisija i Stručna služba će i dalje vršiti obradu molbi za pomilovanje i premještanje osuđenih lica, pružanje međunarodne pravne pomoći, kao i izrada odluka, rješenja i zaključaka usvojenim na sjednicama Pravosudne komisije.

Stručna služba vršiće i poslove prijema dopisa, zahtjeva, molbi, i drugih pismena koje predaju institucije i građani, te dostavljati odgovore u saradnji sa predsjednikom Pravosudne komisije.

## **FINANSIJSKA SLUŽBA**

### **- Redovne aktivnosti Finansijske službe**

- izrada projekcije prihoda za period 2026-2028. godina za potrebe izrade Dokumenta okvirnog budžeta (DOB-a);
- izrada Dokumenta okvirnog budžeta (DOB-a) za period 2026-2028.godina, na osnovu „Budžetske instrukcije broj 1“;
- prikupljanje podataka za izradu prijedloga operativnog i kapitalnog budžeta za 2026. godinu, u skladu sa „Budžetskom instrukcijom broj 2“;
- izrada prijedloga operativnog i kapitalnog budžeta za sve pravosudne institucije za 2026. godinu;
- učestvovanje u radu Skupštinske komisije za Budžet prilikom usvajanja budžeta Pravosuđa za 2026. godinu;
- izrada i ugradnja amandmana u prijedlog budžeta Pravosuđa za 2026. godinu;
- izrada konačne verzije budžeta Pravosuđa za 2026. godinu, nakon usvajanja od strane Skupštine;
- izrada prijedloga i konačne verzije rebalansa budžeta Pravosuđa za 2025. godinu, po ukazanoj potrebi;
- podnošenje zahtjeva za unutrašnju preraspodjelu odobrenih budžetskih sredstava za 2025. godinu u skladu sa Zakonom o izvršenju budžeta;
- prijem, kufiranje, kontrola i plaćanje računa dobavljačima za primljene robe, izvršene radove i pružene usluge;
- izrada tenderske dokumentacije i pokretanje procedure javnih nabavki za sve pravosudne institucije u skladu sa ZJN BiH;
- podnošenje „Zahtjeva za nabavku“ na osnovu izrađenih tenderskih dokumentacija Pododjelu za javne nabave.
- otvaranje „Naloga za nabavku“ i praćenje realizacije istih do konačne isporuke i prijema roba, radova i usluga.
- kontiranje i knjiženje finansijske dokumentacije za sve pravosudne institucije u svrhu praćenja izvršenja budžeta ;

- vođenje porto blagajni za sve pravosudne institucije ((plaćanja, vođenje blagajničkih knjiga (nalog blagajni da naplati, nalog blagajni da isplati), provođenje blagajničkih naloga kroz blagajnički dnevnik, kontiranje blagajničke dokumentacije te kontrola i likvidacija iste));
- isplata vještaka, svjedoka i tumača po dostavljenim troškovnicima i rješenjima;
- isplata advokata po rješenjima postupajućih sudaca;
- praćenje izvršenja operativnog i kapitalnog budžeta;
- usuglašavanje izvršenja budžeta na kontima klase 6 i 8 za sve pravosudne institucije sa stanjem u glavnoj knjizi;
- vođenje evidencija o prisustvu zaposlenika na poslu na propisanim obrascima radi obračuna plata;
- izrada prijedloga tromjesečnih operativnih planova za Pravosuđe Brčko distrikta BiH;
- izrada izvještaja (izvještaji o izvršenju operativnog i kapitalnog budžeta, izvještaj o provedenim postupcima nabavke i dr.);
- izrada dopisa i prijedloga te pružanje pomoći iz oblasti financija i računovodstva u radu svim zaposlenim;
- usuglašavanje naplaćenih prihoda Osnovnog suda i Pravobraniteljstva sa stanjem u glavnoj knjizi
- praćenje prometa (uplata i isplata) na depozitnom računu Osnovnog suda
- provođenje aktivnosti vezanih za popis stvari, materijalnih prava, potraživanja i obaveza institucija Pravosuđa Brčko distrikta BiH.

#### **- Posebne aktivnosti Finansijske službe:**

- po ukazanoj potrebi učestvovanje u pripremi zakona i drugih provedbenih propisa kao i izrada pravilnika kojima se regulira rad službe; briga o poštivanju provođenja propisa kako u radu službe tako i u provođenju istih od strane institucija Pravosuđa.
- po ukazanoj potrebi učestvovanje na radionicama i sastancima organiziranim od strane evropske komisije i priprema potrebnih akata u cilju realizacije dodijeljenih sredstava u okviru odobrenih projekata, kao i pravdanje utroška istih;
- po ukazanoj potrebi učestvovanje na simpozijumima, seminarima i radionicama organiziranim od strane strukovnih institucija iz oblasti računovodstva i revizije u cilju stručnog usavršavanja zaposlenika službe.

#### **SLUŽBA INFORMACIONIH TEHNOLOGIJA**

Služba informacionih tehnologija će u toku naredne godine između ostalog obavljati i sljedeće poslove iz svog djelokruga rada:

##### **- Redovno održavanje IT sistema**

Redovno održavanje:

- Računarske mreže i serverske infrastrukture (HyperV virtualizacijska platforma, Active Directory, Exchange server, WSUS, AV, VOIP, serveri baza podataka i

aplikacija, serveri sistema tehničkog obezbjeđenja, file serveri, sistem za monitoring, prikupljanje logova i alarmiranje, switchevi, routeri, firewalli i wifi uređaji),

- Sistema za Disaster Recovery i redovan backup podataka,
  - Održavanje klijentskih računara,
  - Održavanje opreme za štampanje, skeniranje i kopiranje,
  - Održavanje baza podataka i aplikacija registra zemljišta i registra poslovnih subjekata u Osnovnom sudu,
  - Održavanje aplikacija VSTVa koje se koriste u pravosudnim institucijama BD: CMS, TCMS, SOKOP, RNKPE, i sl.
  - Održavanje sistema za vođenje zapisnika i snimanje sudskih rasprava, sistema za prezentaciju dokaza, sistema za saslušanje daljinskim putem, sistema za saslušanje maloljetnih lica i zaštićenih svjedoka,
  - Održavanje i ažuriranje web stranica pravosudnih institucija.
- **Realizacija kapitalnih IT projekata**

Potrebno je izvršiti nabavku novih računara. Naime, 2/3 postojećih računara od njih približno oko 250 nisu kompatibilni sa Windows 11, a Windows 10 operativnom sistemu ističe podrška u drugoj polovini 2025. g. Isti su i dotrajali (2010-2018. g.). Postoji i instrukcija VSTV o potrebi obaveznog prelaska na Windows 11 imajući u vidu prestanak podrške za Windows 10. 1/3 računara (nabavljeni 2019. i kasnije) su kompatibilni i biće upgradeovani na Windows 11 uz eventualno pojačanje memorije.

Imajući u vidu da nije uspjela nabavka softwera za upravljanje predmetima u Pravobranilaštvu u sklopu ugovora sa početka 2024. g., pokušat će se pokrenuti nova nabavka u zavisnosti od raspoloživih budžetskih sredstava.

Izvršiće se nabavka serverske opreme i opreme za skeniranje i štampanje tamo gdje se procjeni da je ista dotrajala, ili gdje postoje očigledni nedostaci.

- **Podrška korisnicima IT sistema**

Služba će nastaviti da pruža kontinuiranu podršku korisnicima IT sistema, te vrši po potrebi obuku korisnika.

- **Obuka i usavršavanje zaposlenika IT službe**

Potrebna je obuka zaposlenika IT službe za nove Windows OS, Exchange email server, SQL bazu podataka i dr. tehnologije koje se koriste u pravosuđu. Ovaj dio je zapostavljen prethodnih godina prvenstveno zbog pandemije i otkazivanje većine ranije najavljenih kurseva. Ovome će se pristupiti ukoliko bude moguće obezbjediti finansijska sredstva.

- **Održavanje ostalih tehničkih sistema**

Ova služba će kao i dosada učestvovati u održavanju sistema koji i nisu primarno IT sistemi: sistema tehničkog obezbjeđenja (video nadzor, protivprovala, kontrola pristupa, vatrodajava, panik dojava, razglas i sistem besprekidnog napajanja), sistema grijanja, hlađenja i ventilacije i sistema protivpožarne zaštite.

- **Nabavke usluga iz tekućeg budžeta**

Zavisno od raspoloživih sredstava, potrebno je planirati nastavak digitalizacije zemljišne knjige Osnovnog suda (skeniranje, indeksiranje i omogućavanje pretrage) koji je započeo u 2022-23. godini (digitalizovano 300 ZK što je nešto više od 60% ukupnog broja knjiga).

Zbog isteka postojećih okvirnih sporazuma potrebno je planirati izradu specifikacija i provođenje postupaka nabavki usluga održavanja sistema tamo gdje su sporazumi istekli, tamo gdje postupak nabavke nije uspio, ili tamo gdje se bliži istek postojećih sporazuma.

## **SUDSKA POLICIJA BRČKO DISTRIKTA BiH**

Sudska policija Brčko distrikta BiH (u daljem tekstu: Sudska policija) pruža pomoć Apelacionom i Osnovnom sudu u skladu sa zakonom, u smislu pribavljanja informacija, izvršenja naloga suda za dovođenje učesnika u sudskom postupku prema nalogima sudova, sprovođenja osuđenih osoba u ustanove za izvršenje sankcija izrečenih presudama suda, održavanja reda u sudnici, osiguranja sudija i službenika suda, kao i drugih osoba unutar suda, internog osiguranja zgrade suda, te izvršavanja drugih naloga suda.

- **Sigurnost pravosudnih institucija**

Sudska policija će u 2025. godini nastaviti sa izvođenjem kontinuiranog osiguranja objekata pravosudnih institucija. Osiguranje će biti organizovano sa neophodnim brojem sudskih policajaca, u zavisnosti od iskazanih sigurnosnih potreba, korištenjem kombinovanog sistema fizičke i tehničke zaštite.

U tom smislu će se ostvariti puna saradnja sa zaposlenim u Službi za informacione tehnologije zaduženim za praćenje i održavanje elemenata sistema tehničke zaštite, kao i sa zaposlenim zaduženim za prijem i usmjeravanje posjetilaca u zgradi pravosudnih institucija u skladu sa Uputstvom o radu zaposlenika fizičkog i tehničkog osiguranja.

- **Realizacija naredbi i zahtjeva pravosudnih institucija**

Sudska policija će u narednoj godini postupati po naredbama suda koje se odnose na sprovođenje u kazneno-popravne institucije, dovođenje osoba sa adrese u Brčko distriktu BiH, dovođenje osoba iz kazneno-popravnih institucija. Radiće se i na realizaciji drugih zahtjeva suda kao što su: uručenja pismena, provjera adresa, osiguranja suđenja, asistencija sudskim izvršiteljima na terenu i dr.

Sudska policija će u skladu sa svojim nadležnostima postupati i po zahtjevima Tužilaštva u skladu sa Sporazumom o pružanju pomoći obavljanjem sigurnosnih poslova.

O preduzetim aktivnostima po svakoj konkretnoj naredbi blagovremeno će se obavještavati nadležna pravosudna institucija.

Nakon izrade izvještaja o radu za 2024. godinu izvršit će se analiza podataka, naročito uzroka nerealizovanja naredbi, kako bi se procenat realizacije poboljšao u narednom periodu, posebno u dijelu koji se odnosi na nepronalazak osoba koje su u trenutku potraživanja odsutne sa adrese, ali se ne nalaze izvan Brčko distrikta BiH.

Takođe, preduzimaće se i druge neophodne mjere u ovisnosti o drugim uzrocima do kojih se dođe analizom.

**- Doprinos u poboljšanju sigurnosnih i zakonskih standarda**

Predstavnik Sudske policije će aktivno učestvovati u radu Radne grupe Visokog sudskog i tužilačkog vijeća BiH za sigurnost pravosudnih institucija i nosilaca pravosudnih funkcija u BiH, kao i drugih radnih grupa po pitanju evropskih konvencija za zaštitu ljudskih prava osoba lišenih slobode.

**- Unapređenje zakonskih i podzakonskih rješenja**

U skladu sa zakonskim rješenjima predviđenim Zakonom o sudskoj policiji Brčko distrikta BiH i u narednoj godini će se pratiti i inicirati usklađivanje postojećih zakonskih i podzakonskih rješenja, s ciljem izjednačavanja radnog statusa djelatnika sudske policije i djelatnika Policije Brčko distrikta BiH, posebno u dijelu zapošljavanja sudskih policajaca-pripravnika, bolje organizacije i unaprijeđenja rada Sudske policije Brčko distrikta BiH. Uz napomenu da je u toku 2024. godine Pravosudna komisija uputila u skupštinsku proceduru novi prijedlog Zakona o Sudskoj policiji Brčko distrikta BiH.

**- Unapređenje rada Sudske policije**

U toku godine će se raditi na poboljšanju kvaliteta postupanja po zahtjevima Suda kroz preciziranje određenih smjernica i protokola postupanja po konkretnim predmetima. Takođe, radit će se na poboljšanju postojećih pravilnika, radnih evidencija, kao i kreiranju novih potrebnih elektronskih evidencija.

**- Izvještavanje i obuka**

Sudska policija će sastavljati mjesečne, šestomjesečne i godišnje izvještaje o radu i dostavljati ih predsjedniku Pravosudne komisije. Predsjednik Pravosudne komisije će biti obaviješten o svim sigurnosno-interesantnim događajima koji su proistekli iz poslova Sudske policije i postupanja po naredbama.

U skladu sa uočenim potrebama u toku godine će se organizovati obuka sudskih policajaca, a teme će biti određene iz važećih propisa po kojima postupa Sudska policija. Teme, kao i drugi elementni obuke će biti predviđeni Planom i programom obuke, a realizacija i ostvareni rezultati će biti obuhvaćeni godišnjim izvještajem o radu Sudske policije.

**- Održavanje i nabavka MTS**

U toku godine će se izvršiti nabavka dijelova uniforme za koje po važećim propisima ističe rok trajanja, kao i drugih materijalno-tehničkih sredstava, te će se po tom pitanju ostvariti saradnja sa Finansijskom službom.

U toku godine će se upućivati zahtjevi Pododjeljenju za održavanje službenih vozila radi izrade predmjera radova za servise službenih vozila, kao i za produženje reigistracije vozila, s ciljem postizanja što boljeg kvaliteta u upravljanju povjerenim materijalno-tehničkim sredstvima.

Broj: SuPK-00-2265-II  
Brčko, 16.12.2024. godine

